

四庫全書

子部

欽定四庫全書

子部

羣書考索續集卷三十七

詳校官中書_臣竇汝翼

主事_臣祁韻士覆勘

總校官知縣_臣楊懋珩

校對官中書_臣徐步雲

謄錄監生_臣沈安邦

欽定四庫全書

羣書考索續集卷三十七

宋 章如愚 編

官制門

監司

周始制監司王制云天子使其大夫監其方伯之國國

三人

漢監司漢刺史無常員時遣丞相史分刺諸州黜陟賢

否理斷寃罪武帝始置部刺史十三人秩六百石專以
六條察二千石其秩卑其權重故能激昂而自奮也朱
博為冀州刺史行部不察黃綬吏民有言縣丞者令各
詣部何武為揚州刺史所舉奏二千石長吏必先露章
服罪者為虧除免之而已是二者可謂得刺史之體矣
至於鮑宣舉措煩苛代二千石除吏聽訟所察過詔條
則勢偏郡國而後侵預其事矣

宋朝監司宋朝之監司漢之部刺史遺制也元城先生

嘗論之矣漢部刺史十三州以六條問事其五條則皆及二千石考其秩則六百石乃在千石縣令之下也秩卑則其人自奮權重則其志得行至於綏和更之為牧秩二千石其法墮矣唐制諸道帥臣兼觀察之權無有糾其非者是則綏和之制矣宋朝之監司以臺省寺監為之雖宰臣從官為帥亦許糾劾是則元豐之制也二三百年無方鎮之患其此之由歟宋朝監司有轉運使副有轉運判官使之按察官吏可也而又有提點刑獄

有武臣同提刑使之並察官吏可也而有提舉常平提舉茶鹽轉運置於乾德判官置於開寶使副置於太平興國此轉運之職也淳化中置提點刑獄四年省之景德中復置天聖六年罷之八年復置而治平罷之迨置於熙寧而提刑之職遂不廢提舉常平置於熙寧而元祐罷之既而隨罷隨復提舉茶鹽置於宣和而紹興罷之既而或置或罷迨至紹興之五年常平茶鹽併為一司而後提舉之職定矣然今之使副運判既不雙除武

臣提刑罷之復久常平茶鹽合為一司其名雖繁其職實簡昔在仁宗朝銳意太平責任牧守於時范公仲淹在政府取不才監司一筆勾去而張溫之之徒首被茲選風聲凜凜聞者恐懼當時不堪遂以三虎四瞪之名中之卒罷按察之名而變仲淹已行之政歐陽公有言按察所奏不能與行沮毀者一言便加輕信嗚呼若此而望部刺史之舉其職難矣哉

泉司唐有諸道鑄錢使故今之泉使亦曰都大鑄錢司

然必兼提點坑冶以為名者錢以銅為母而鉛錫其助也夫既以鑄錢為主意今其弊乃至於銷錢者何哉蓋黃金白銀元無與於鑄錢而上之人利於得銅乃以是而優鑿山者俾之多方營銅也其意則善其法則未然者地之所產有無不可以強同也愚民利於金銀之獲不復計夫銅之有無採之於山既不可得則計無從出未免復銷錢以為銅耳利之所在死且不顧是豈刑罰之所能禁哉夫鑿山而得之者與銷錢而為之者其質

迴絕不同所司獨不辨之乎蓋吏胥均其所入之利而上下更相蒙也銅日加多而錢日加少名曰鑄錢司乃導民銷錢之地也有能隨五金之所入而不強無以為有則害除而利自興矣

總司方今駐蹕吳會上流自蜀漢下流則負海江淮綿亘其中凡數千里所當控扼者皆制軍馬小戍數百大屯數千漕臣所入租賦而入於總所總所會所入錢糧以餉諸屯統軍者不與錢糧掌財者不施節制所以專

其責而分其權也以無事之時言之漕臣足以辦事以有事之時言之四總未為贅員凡是區畫得失相半然財之所聚公廉者寡貪冒者多籍浩繁之入而為奸利之資者不無官吏之弊不嚴賞罰軍政何由而肅乎

文公云總領一司趙忠簡所置

語錄

常平茶鹽司宋朝立法初意常平所以濟民饑茶鹽所以助國用昔分為二今合為一使之有無相通上下兼足也然今日在在常平有名無實茶鹽之利一孔無遺

何於利民者恣然而於利國者獨留意耶嘗觀熙寧變
法諸州常平免役義倉市易坊場河渡等錢者委郡貳
主之此乃王安石行青苗新法籍此以為國息也人主
意在國息則利民之事不能以兩立矣今日雖去青苗
之擾而諸州茶鹽香礬與夫所謂經總制錢所司督辦
毫髮必計於此重則於彼輕宜乎常平雖有移互之禁
覆糧之令更相蒙蔽徒為具文也獨不可原其故而為
之所乎

論監司當改作按察自秦置守尉監司有郡守刺史如今監司專主按察至漢末令刺史掌兵遂侵郡守之權兼治事而刺史之權獨重後來或置或否某嘗說不用許多監司每路只置一人復刺史之職正其名曰按察使令舉州縣官吏其下却置判官數員以佐之如轉運判官刑獄判官農田判官之類農田專主婚田轉運專主財賦刑獄專主盜賊刑獄而刺史總之稍重諸判官之權資序視通判而刺史視太守判官有事奏聞則刺

史為之發奏刺史不肯發則許判官徑自申御史臺尚書省以分刺史之權蓋刺史之權獨專又不是若非其人則害貽一路又須重諸判官之權諸判官之下又置數員官屬如職屬官之屬如此則事權歸一太守自治州事而刺史得舉刺一路豈不簡徑省事又無煩擾耗蠹之弊今之主管雖視通判資格但權輕不能有所為但得奉承運使而已若分為判官又為專達則監司不

敢妄作矣

文公

監司不盡其職皇華遣使專務咨諏繡衣直指風動列城是豈蒙蔽苟安之地哉則養安以自重積日以計資以因循為識時以緘默為得計以容奸為寬大以舉職為煩苛以興利除害為生事以激濁揚清為抗奸一事之當為則上下相倚首尾兩端文符往來終於不立一吏之當劾則左右顧望畏首畏尾符檄雖峻卒亦如初褰帷問俗所不暇也馳騁原隰所不便也深山窮谷或以險阻不及至新貴故交或以人情不欲至其所至者

則前遮後擁吏卒漁獵悉飽其欲而後去反不若不去之為愈者

監司不敢舉劾况監司之於郡縣亦有不敗者某郡之守嘗為侍從也則幸其復為侍從而有所求某郡之守嘗為臺諫也則恐其復為臺諫而有所擊至於縣吏之與在朝有姻有舊者皆不敢問也民訴其守則封其詞以送其守民訴其令則封其牒以與其令是為守令執仇讎也守令從而甘心焉後有冤者夫誰敢言州縣之

胥憑守令之寵以暴訴民誅之者某守令然章奏相望無非鼠雀之盜聲勢交援或漏吞舟之魚耳

輕從非人有以秩卑假以重權者漢之六百石察郡國是也有以權重而得專務祿者唐之以使持節是也使臨益部上動星驛車駐徐州旋至雨澤刺史之任所關如此而可輕畀其人哉非精神剛正不畏強禦則不足以任其職非風采奮發事業雄偉則不足以振其權在慶歷時廉直中正者方得舉而苛細矯激之人不用也

嘗任縣邑者方擢為按察而僥求苟至者不擇也其後
公正聰明之有科剛方豈弟之有目固不容非才濫廁
其間者孝宗嗣位益重其選宰相進擬必反覆審問且
親洒宸翰欲得剛正者奏舉數人監司之不輕畀也如
此今也親擇之意易而為拘牽者法薦選之功變而為
攷任之弊郡印方綰已懷攬轡使車未還覬倖且有先
為之地者不風力則勢要請托皆得以行其私資考是
遷則闌茸庸繆皆將執例以取償於我矣

任監司之說有三愚嘗論任監司有三說資望不可太輕遷徙不可太數文法不可太拘資望輕則屬吏不畏遷徙數則意旨不行文法拘則省察不周知此三說則上之人無媿於責任下之人得以盡其職矣

郡守

漢郡守漢郡守地大而權重故二千石得以專制而有以盡其才按會稽一郡合今浙東西之地在其封內則其權安得不重趙廣漢之將兵屬蒲類將軍擊匈奴朱

買臣將兵與橫海將軍擊東越是其兵得以自將而征
討矣朱博召見諸曹吏書佐及縣大夫選視其可以用
者盡斥罷諸病吏薛宣移書屬縣黜陟易置惟其所為
是其僚吏得以自進退矣文翁減省紀用度而自興學
校尹翁歸論棄東海大豪市而莫能犯禁是其財賦刑
獄又得以斟酌輕重而自用之矣然觀張敞與朱邑書
曰佐敞遠守劇郡馭於繩墨宵臆約結固無奇也雖有
亦安所施龔遂之於渤海亦願丞相御史無拘於文法

得一切便宜從事則知宣帝懼其專制而馭之以法矣夫是以漢之太守其地雖大其權雖重俯首聽命惟上所令而不聞其跋扈難制之患者蓋自上有所馭之之道耳杜延年吾丘壽王一以治郡不進盜賊竊發則璽書詰責之而治行第一課最上聞有增秩賜金之寵核實之法嚴賞罰之用明此漢之所以多循吏也

唐郡守方鎮之禍豈獨唐世然哉原其所以致之之由由夫郡守之無權耳原其所由始於漢末而然矣初漢

置郡守以察郡國秩不過六百石漢成帝時遂更為牧
秩中二千石則常一變矣始時奏劾二千石長史者皆
下三公遣吏驗實然後退黜及光武即位不復委任三
府故權在州牧廢置自由則又變矣其始以六條詔察
過失者罷其後乃與賦政治民之事則又一變也始則
傳車周流後乃更為重鎮爭據土地則又一變也愈變
愈重至於東都之末方鎮之形已成而劉晏建論猶請
重其權任郡守之權悉歸牧鎮知有牧鎮而不知有朝

廷太守之興嘗易太守為刺史又假之以使節之稱按
前此所謂使持節者皆得專戮二千石以下是以古所
以假太守者而假刺史此其重之之意豈無謂哉惟其
邊屯之兵總之都督又其品位崇重不為少卿而刺史
見都督之禮又已先為之極至且唐制刺史見都督必
首屬戎服不敢以客禮見今孤嶮為吉州刺史堅不如
制見觀察使齊映謫為別駕此則雖假之以漢刺史之
名果何益哉開元以來諸道使得專傳刺史而代宗使

劉晏攷刺史六品以下杖而後奏此則所謂使持節之名又何相戾也郡守日輕而方鎮日強是無足怪

宋朝郡守大哉宋太祖之立國也夫趙中令之謀國也方鎮之強為天下深患弊根蠹穴蓋數十百年莫能去一旦盃酒從容談笑閒雅控制御抑制有如嬰兒分其支郡在此無疑心留之邸地在彼無缺望置轉運以警其志置倖貳以分其權其規模遠矣哉夫收天下之精兵聚之京師州郡之兵若不足也而猶足以自衛也聚天

下之財穀入之京師州郡之財若不足也而猶足以自給也大郡十數指揮中郡五七指揮小郡三五指揮軍儲餉給屬之運司統制軍馬隸之守倅一旦有警可以使之犯難而忘死其兵何如哉二稅分數隸屬州縣地利贏餘歸之本州經費職之軍資庫犒宴職之公使庫而又使之回易收其息利其財何如哉強不至縱弱不至削此國初之制然也熙寧大臣用意過當盡削州郡之權籍郡縣兵併兵額一路團結五千人為一將置將

副專領軍情離貳役使不行而州郡之兵弱矣免役青
苗色色取辦舊例財帛悉歸經費守臣所有者止有限
額正使錢而已而又禁其回易限其醞造而州郡之財
匱矣兵不足以自衛財不足以自給一有警急束手無
措後日之患君子已預卜之嗟夫州郡之權不可以不
削亦不可以過削不削則縱過削則弱得其中者其惟
國初乎

京尹自漢以來京尹之任類多聲稱

趙張三王劉晏許
孟容韋渙黎幹魏

少遊薛
元賞輩

近世亦然近故也

歐陽修韓維吳亢范仲淹蔡襄杜衍劉沆

輦轂之

下百官軍民萃焉四方萬里瞻焉君相必先知其人而後任之任是職者必自度其才而後居之也近觀列城凡令城下者類能自持亦以近守貳之故歟其亦自度其才之足以辦此歟廟堂量才之地必審擇天下之守令與夫守令之所以自審者皆然則郡邑之治班班可紀矣

郡守得人紫雲之宴切責藩侯選德之屏書及郡守祖

宗之重牧守者如此哉先張後王有聲於蜀邵父陳母迭稱於廣張方平之尹開封也人不敢欺田況之守成都也人不忍欺或以寬厚而比仲詩或以清介而過馬援遺錢不取劉君之盛德也外戶不閉曾公之美政也二州竟留杜公之遺愛循吏之政班班可紀邈其自來寧非自上之人有以激勸之哉

守令

守令守令自秦人郡縣七國未之有改也宋朝懲五季

藩鎮之弊凡朝臣領外寄者必帶省曹寺監宮僚之名奉使而出上至牧守監司下至倅宰管庫通以奉使目之所以均內外輕重之任也至孝宗朝不任守臣不為郎不任縣令不除監察御史亦此意也然漢多良吏類由久任宋元嘉之政卓冠江左亦由守宰以六朞為斷也宋初懲創藩鎮之弊失之過甚而守令者率不過二三年重以熙寧新法之擾郡縣之財悉歸公上任是職者朝夕皇皇惟以財賦為念席不暇煖民不及親而去

官之日近家食之日遠為身之計紛然四出其何以循
良為哉雖然未仕善士皆可為也既仕循吏皆可為也
古者循吏省刑而薄賦斂今也倚刑而聚斂古者循吏
奉法而循理今也任法而背理板曹之供輸監司之督
辦無名之需非時之擾文移交馳促迫逮繫然則為州
縣者如之何而省刑薄斂奉法循理乎曰黃霸事刑名
之主而以寬和著名卓茂當紛亂之世而視民如子內
心有主行其所學無往而不可中無得焉視人以為趨

向雖平世亦不可為矣

遠方守令虐民無由上達近之官吏賢耶民譽之歌之不賢耶譏之謗之譽歌譏謗者衆則必傳傳則必達於朝廷是官吏之賢否易知也一夫不獲其所訴之刺史刺史不問裏糧走京師緩不過旬日撾鼓上聞而有司不得不省矣是民有冤易訴也吏之賢否易知也遠方之民雖使盜跖為之守檇杙饕餮為之令郡縣之民羣嘲而聚罵者雖千百為輩朝廷不知也白日執人於市

誣以殺人雖其兄弟妻子聞之亦不過訴之刺史不幸而刺史又抑之則死且無告矣

老泉

今日守令之弊守令之奸民號而訴者案牘相銜也重者不過罷去次者僅免而已舒之歲月民血之未乾而謫罰之書又以恩貸矣至於公卿大夫貪沓冗耗以不稱職聞者則皆剖符以左遷之不意父母斯民之職乃為逐臣之淵藪也何公剡嘗言於先朝曰上賢使之為三公次賢使之為臺諫監司下賢使之為守令是大

不然鄴州刺史以親故除豐城令尹以求劍補於已則便如國家爵祿何於私則便於天下蒼生何

陳傳良

善治所感蝗避中牟鳳集潁川九江得人而去猛虎潮陽得人而去鱷魚善政感物者也米以王渙而通粟以李峴而賤有李勉則夷舶來有薛公則魚鹽至善政感人者也

吳弁

秦無賢守令故民離而亡秦之吏非殘忍侵漁以逢其君則貪黷幸灾不逞之人也於是民之欲亡秦者十戶

而八九矣關東之豪投袂一呼毛奮而鱗集戮力以傾秦者不可勝計烏合之師所至如破竹者大率皆郡縣其守邑倖其令以應之也不然則吏為自全之計挈地以賂而市一旦之命也又不然則談士掉三寸之舌傳檄而風靡其同黨之惡不遠臣妾者如三川守由四川守壯南陽守騎亦徒驅欲潰之民疾鞭而戰之不戰而塗地矣秦以虎狼之資尺攻寸取以吞天下一夕有變而三十六郡皆無人之墟子嬰之席未煖而天下嬗漢

何也無良吏也

守令數易之弊天下非怨吏之可畏也民怨之可畏也
今日遷其守明日易其令其擾則妨民其費則傷民其
無意於留而苟簡於治則弊民其自以為將遷而求足
其欲則又困民故夫吏之便民之病也

蜀廣之守不應輕畀廣蜀之辟置近者數千里遠者萬
里一時部使者以奏牘來上其能否其賢不肖一聽之
所薦之人其親與故不知也其利與勢不知也其果長

於治郡與否不知也是又出於堂除部缺之外也名藩
巨鎮非長才弗畀無已則曰姑與廣郡與之蜀郡而已
是則蜀廣之守非庸才不任事之人則同列所不齒之
士也天下之勢無遠近無內外凡隸一圻皆吾郡凡受
一廛皆吾民豈有近之民為重而遠者之可輕也豈有
近之地為貴而遠者之可賤也王者以民為天廣蜀之
民何罪而獨不在所重也

守令在勸沮郡計不上璽書切責密令治化擢為三公

懲勸之道時出而用之則騰桑麥之歌沸襦袴之謠鳴
單父之琴富河陽之花將比比矣

縣令

漢縣令有自孝廉舉者

趙廣漢王導劉輔尹賞平當

有自賢良舉者

魏相貢禹

有自直言舉者

王導

有自方正舉者

房鳳

有自茂才舉

薛宣龔勝

有自四行舉者

何武

有以能治劇而選者

何並原涉陳導

尹賞有自郡吏積功而選者

朱博王訢

則登進之路亦廣矣有

遷郡守者

王導魏相何並名信臣陳萬年

有遷刺史者

朱博

有遷諫大夫

懲勸之道時出而用之則騰桑麥之歌沸襦袴之謠鳴
單父之琴富河陽之花將比比矣

縣令

漢縣令有自孝廉舉者

趙廣漢王導劉輔尹賞平當

有自賢良舉者

魏相貢禹

有自直言舉者

王導

有自方正舉者

房鳳

有自茂才舉

薛宣龔勝

有自四行舉者

何武

有以能治劇而選者

何並原涉陳導

尹賞有自郡吏積功而選者

朱博王訢

則登進之路亦廣矣有

遷郡守者

王導魏相何並名信臣陳萬年

有遷刺史者

朱博

有遷諫大夫

頻年豐稔猶難支吾歲一不登立見狼顧是以因訟事而科罰其初數十千羨至數百千用歲課而預借其初一二年旋至五六年

州縣貪殘害民等事科罰之賦私入以為已物沾籍之法輕用以為已威兩淮之陸運差科至於重疊而民戶之流離不卹也蜀道之夫錢數斂至於再三而井邑之蕭條不顧也沿海諸郡之船番根括及細微而吏胥之奸弊不問也貪吏誅求民財困於蠹賊虐吏峻急民財

困於追呼奸吏狎侮民財困於曲法懦吏委靡民財困

於猾胥

劉謂

一握州麾便肆貪欲訟牒則不問其曲直

獄市則不究其是非窮晝徹夜惟財是求常賦之外別立科名刷遞年已闕之錢立青冊不移之限旬分定數納必加數或遣吏置局而拘催或差官下邑而根括縣道既極煎熬民間又難催索於是行一切之政據不根之詞開告訐之門以網無罪設羅織之獄以竄富民對人則戚戚嗟嗟謂周弊之難復對吏則唯唯諾諾議事

則端有可尋是以今日有窮空州郡而無窮空之知州
有貧乏縣道而少貧乏之知縣天下財賦不在朝廷不
在百姓而在士大夫之箱篋

州縣吏便已而害民朝列而請郡曰吾為婚嫁之未畢
也家食而求郡曰吾為孥累之猥衆也勢利之結交以
冀援於異日親故之饋遺以報恩於平時於是以家為
郡矣改秩而試邑曰吾姑以應令而非得已也選人之
為令曰吾病於徒勞而無補也於是以傳舍視邑矣

朝廷無幸法郡縣無幸吏則天下無不幸之民

云朝廷

不能無幸法則天下安得無幸吏天下不能無幸吏則天下不能無不幸之民矣一守之幸一郡之不幸也一令之幸一邑之不幸也是以賦取有常數而擅移預借百端以取之無卹也財入有定額而擅發移用陰以取之弗顧也民既竭矣而斂不休力已匱矣而役未已民果何罪而吏與之仇也蓋不仇民則無以資吾之苞苴也無以厚吾之囊橐也

能吏良吏不同精神可以照民情風力可以駭俗聽吏之能也吁抑孰知斲喪斯民之和氣虧傷國家之至仁者未嘗不在於能吏乎夫能吏以督租辦課為能以搏奸擊強為能以一切之美觀善最為能以巧取陰奪之計無出其右為能而所謂良吏者則輸課以後期聞涖政以無能聞抑強扶弱以不得其術聞巧取賂遺以不由其徑聞然吾講求田里之隱陋則吏之以能名者往往有賦毒於蛇政猛於虎民敢怒闕

於天而籲無告者而郡有循吏則政藏於市廛之貿易

闕

於農桑之種植而良法美意則隱然於匹夫匹

婦之心惜哉良吏之不多見也上雖有意於精擇然所得者辨明法令者耳鉏擊奸邪者耳知事情於鉤距者耳學道愛人於武城者誠心於單父者有乎無也三稱善於蒲不敢欺於邾者有乎無也嗟夫珥筆教訟者傳問孝之章顰耳鎖吭者深春耕之耒一邑之微古人之治如此正不待夫今之所謂能吏也理財者牟利如

秋毫立威者用刑如刺骨知術者施鉤距文法者用刻
深則必曰能吏也有用之才也持心近厚者似怯慮事
過詳者似遲好持義者似迂恥言功利者似拙則必曰
腐儒者無用之才也非操切之風勝而豈弟之政泯歟
上供之數使之無缺留州之租足以自給則偃然自足
以為稱職矣雖期會急於星火文移慘於矛戟上之人
不問也課額一有不敷綱運一有不繼則忿然遂去恨
晚雖小民愛如父母百姓以為司命上之人不卹也非

撫字之心薄而催科之令慘歟

孫琰

饕餮者以民而填其

貪贓之溪壑健者以民而試其屠剝之斧斤

上不應以財賦責守令今天下郡縣皆為計司理財之地承流宣化字民之職皆為計司理財之官常賦辦矣雖谿壑其誅求不卹也上供輸矣雖鷹虎其苛刻不責也不然則息爭虞為無益督責之煩徧野農桑莫贖催科之拙世無盧坦孰肯違租賦以受罰人非何易于孰肯却權茶之請以賈禍乎財賦辦則陟陞矣股削生

民剝及肌體無所考也期會失則貶黜矣雖撫字心勞
愛養備至無所見也建章奏上分畫再三其得罪而去
者非茶鹽酒稅之不登則上供總司之不辦也非戶部
常額之過期則轉運需求之不至也詔下褒美增秩賜
金其躡等而進者非額外聚斂之有餘則經費衍用之
俱足也非坑冶鼓鑄之餘數則必密進留州之兩盡也
財不辦則病官財必辦則病民今之試邑甚難也以
易于而短於督賦君子謂之不智以冉求而事於聚斂

君子謂之不仁以淵明而忸於督郵君子謂之不勇

戴星而入令佐之相與語者非錢粟之說無庸議也奉
文書而立者雁行以進非錢粟之計無庸書也箠楚列
於庭下叫號痛楚流血被體非錢粟之事無庸急也

州縣催科獄訟撫字心勞催科政拙聽訟猶人必使凡

有官君子皆知從事斯語

鍾師禹

然至於涖官臨民之

際則所謂財已竭而斂不休民已窮而賦愈急每蹈韓
公昌黎之戒而有司之不犯也囹圄之空虛也刑措之

不用也每不能追還隆古之舊觀何耶豈時非成康文
景之世人非龔黃卓魯之流古今異習而太平官府不
多見於天下耶曰非也夫綰銅章紆墨綬分民社膺胙
土者孰不曰守以牧名當以惠善為先務也帥以師名
當以教化為已任也官以親民為名當以撫字為意而
不容有一夫之向隅也今乃不以留心撫字為稱職而
以財賦促辦為任職不以甘棠聽訟為盛德而以簿書
獄訟為癡兒之了官事是必有由也

奉使

輕相擇使敵國有事相待以相無事將觀以使今之所
以使者亦輕矣曰此人也為此官也則以為此使也今
歲以某來歲當以某又來歲當以某如縣令差役必均
而已矣人之才固有所短而不可強其專對捷給勇敢
又非可以學至也今乃強之彼有倉皇失措為夷狄笑
而已夷狄觀之以為樽俎笑談之間尚不能辦軍旅之
際宜其無人也 丈夫生不為將得為使折衝口舌之

間足矣

遣使女真無謂信使再通謂之屈辱可也謂因以覘國
亦可也邊謀不明彼此間隔藉一介之遣或可盡得其
虛實之狀古之人有行之者鄭元璫之於可汗是也非
外示羈縻之誠則無以為生聚之計古之人有行之者
范蠡之於吳是也譬之奕碁面置東西取舍旁角顧今
日勉之所以結局者何如也

使權輕重提師百萬不能攻城掉舌三寸可以縛敵故

欲戰則使命輕欲和則使命重臨淄之兵志於克敵則
酈生之說姑為餌而恤此使命之輕也平城之役主於
弭兵則婁敬之往舉城望其有成此使命之重也爭
言羶帳執節自誓固可尚矣而乃憚於復往甘言陽許
信而歸報固可喜矣而乃墮其虛給大夫出疆苟利社
稷則可專之春秋之義也或恐假以生事奉使有旨矯
制造命漸不可長漢儒之論也或謂沮抑成功是將如
之何而可

內外官

周重內輕外朝廷郡國天下之爵祿也使士大夫止為區區之爵祿者計則初何內外之分惟其愛君憂國之意有不在此而在彼者此仲山甫徂齊所以允懷而國入所以眷眷於我周公也歟

均內外康王之新陟位也而誥諸侯曰雖爾身在外乃心罔不在王室雖所以勉之適所以慰之也猶曰在中在外猶一體也又稱之曰一二伯父固所尊之亦所以

親之也

周冢宰屬官或問三公與王論道經邦當時下兼冢宰而其所統六十官之屬往往士大夫所不屑為之事何也此固所以論道經邦也人徒見夫內外廷宿衛之士士之賤者也烹庖饗饌之事事之辱者也魚腊酒漿醢醢醢之物物之微者也次舍幄帟裘服為末用而宦寺嬪御灑掃使令為冗役也而不知夫三代以還所以蠱壞人主之心術而侵奪大臣之權而苟茫茫皆是人為之

蓋公卿大臣內外則有限其進退則有時不得日居人主之左右前後也若夫侍御僕從之人備趨走使令之職而人主宴私玩狎之際無不與之同焉比其極也則變換其耳目惑移其心志伺候以和其旨奢靡以中其欲小廉小謹以示其信人主一墮其中則亦何所不至哉故雖以文武之聖而侍御僕從猶樂於得正人而周公之所以相成王而詔後世哉又不獨見於太宰之屬他日立政之作尤拳拳於綴衣虎賁趣馬之微焉

周內外廷相通小宰掌宮刑以貳太宰宰夫掌朝法以貳小宰皆通內外之官也故太僕傳言於宰夫宰夫傳言於小宰小宰傳言於太宰又有內宰雖掌治王內之政令亦屬於太宰以此知周之宮中府中實合為一體也

漢內外無輕重之偏天下之勢有內外而輕重之權勿使有所偏舉則善矣古之人常均內外之勢而中持衡焉不泄邇不忘遠而吏之出入內外初不容有所決擇

於其間漢選郡國守相高第為中二千石選二千石為御史大夫又選博士諫大夫通政事補郡國守相其所以為內外制者未嘗不均一也文帝召季布於河東以其使酒而復之郡若有意於重內者然詔遣列侯之國為吏雖丞相周勃有所不敢辭則曷嘗不以外為重耶是以嚴助之厭承明而出補為會稽守非以內為輕外為重也其均秩之禮則然也蕭望之雅意本朝而不樂平原守非以外為輕內為重也其愛君之心則然也故

助自會稽召留侍中望之自平原入為少府其出入內
外安有輕重區別也哉愚甚懼乎奸邪之害正陰傾巧
計使賢者不獲安處於朝而人主不加察也故沒黯迫
於淮陽而不得久居位雖有出入禁闥拾遺補過之願
而不克遂京房沮於石顯而出為魏郡守雖有通籍殿
中以防壅塞之請而不得行若是曰人臣之顧位有所
決擇內外之心其亦君見之不明哉

漢初內外朝相通其後始不相聞漢御史大夫屬官有

兩丞一曰中丞在殿中蘭臺圖籍祕書權尊勢重與人主親近事下中丞則中丞白之大夫大夫白之丞相是中丞在內丞相御史在外外得以統內也內領侍御史外督部刺史刺史掌奉詔條察州郡治狀黜陟能否以六條問事而奏事復上於中丞是部刺史在外中丞在內內得以統外也要之漢之官制三公九卿雖列職於外而皆有屬以在內以周官之遺意求之則丞相猶太宰也御史大夫猶小宰也御史之中丞少府之尚書猶

宰夫也少府之下又有大長秋猶內宰也大長秋屬少府少府中丞屬丞相御史是秦與漢之制皆近於周之制也不特此也高帝之世御史大夫周昌嘗宴見入奏事見高帝擁戚姬高后之世審食其為相監宮中如郎中令公卿百官皆因之以奏事武帝之世丞相公孫弘亦得數宴見上或時不冠此雖非體貌大臣之意然亦可以見其洞然無內外之限矣夫是以閹宦雖寵丞相猶以檄召而詰責而大長秋中常侍猶參用士人而為之

自武帝晚年宴遊內庭不出不復與士大夫接用宦者
主中書而典尚書之章奏尚書之官於是廢矣既以尚
書居中而憂事又置諸吏居中而舉法故當時奏下諸
事自中書遞送兩府自兩府下九卿自九卿下郡國而
不由中丞中丞之官於是不得居中制事而內之侍御
史外之部刺史併廢矣將軍列侯而下皆得帶加官而
丞相御史獨不如名曰尊之而實疎外之於是丞相御
史無復有至內庭者矣末年以霍光為大司馬領尚書

事宜若合內外為一然亦非丞相職任儼然號稱內朝而併奪丞相御史之權昌邑之廢丞相楊敞不及與議不惟不得至內廷且不復預內廷之事矣夫宦官典中書之任中丞無制事之權三公無加官之號大將軍領尚書之職霍光告田千秋所謂令光治內君侯治外外朝判然如此此漢治之所由以盛衰也及光武懲外戚之用事憤大臣之竊命於是取三公之官以為閑職而職尚書及中書專委任之以為臺閣之長以舉法歸

中丞而以奏事歸尚書二官雖復用事然疎外廷而親
內廷矣捨大臣而近小臣矣置三公而事歸臺閣矣變
前世委任士人之制而專用奴僕薰腐之餘矣桓靈之
季御史之權盡歸於尚書尚書之權又移於宦官尚書
宦官合為一黨而宰相疎隔於外御史緘默於內監自
古內外之不相屬未有如東漢之甚者而其源實始於
光武極其源而論之則又始於武帝使武帝不改漢初
之制使三公九卿在外而以中丞尚書在內內外相屬

而關節脉絡相應則漢之制周官太宰之制也奈何快
意於法度之外使内外事權分裂四出而不專領於大
臣其末流遂以若是極耶

漢内外常若軒輊大抵漢内外朝之勢常若軒輊方外
朝之勢伸則中屠嘉得以召辱大臣及中朝之氣盛則
嚴助朱買臣等輩得以數詘御史丞相太尉彼非能自
為軒輊也顧人主抑揚輕重之意如何耳大抵文帝專
任大臣畏服公議故外朝得志而内廷詘武帝不假大

臣以權勢欲適一己之私意故多致口舌議論之私人
謂之天子賓客以軋之彼其意固與資之自助以排抑
大臣也故中朝得志而大臣誅

唐内外官迭為輕重唐自天寶以前朝廷尊隆士大夫
皆以仕於朝為榮故外輕而內重倪若水以京官選為
河南採訪使不為薄矣然視班景倩貳卿之行至有登

仙之歎

景倩自揚州採訪入為大理少卿若水餞之於郊顧左右曰班公是行若登仙恨不得為騶從

蓋是時雖自朝廷冗官擢為方面者嘗自謂下遷其後

一經中華之變故自是朝廷不尊外勢轉輕而為重加
以刺史月俸至千餘緡而方鎮所取無藝京官之祿浸
浸寡薄故薛邕由左丞刺歙州此貶也而家人恨降之
晚崔祐甫任吏部員外而有洪州別駕之求自方鎮入
八座至謂罷權凡幕府賓僚有所忤於主帥者始薦入
為郎吏其嘗遷臺閣者又寧以不赴取罪去矣然推原
士大夫所以恥立於朝廷之故蓋亦有謂是殆不在於
區區俸祿而已李泌增俸之請母乃見其一未見其二

乎 盧懷慎曰明主之於萬物平分而無偏施以罪吏而牧遐方是謂惠近而遺遠彼遠方何負聖化而獨受其惡政乎

宋朝均內外州縣為滯路朝廷為經途重內輕外人情大抵然也雖然亦在乎所以取之如何耳祖宗典憲改秩者必宰邑典郡者方除郎寺監丞之既更必出千里之地郎官卿監之已歷必分一道之節更迭之制為一代之良法是陳若拙知潭以辭而被責郭贇知天雄雖

辭而卒遣祖宗之職令如此孰敢以外地為輕哉趙昌言之知天雄以能政稱而參大政劉昌言倅河南以言事稱旨而知樞密院祖宗之恩賞如此孰不以外地為重哉當是時風俗渾厚人知義命張知白身在館閣而乞領外郡韓授官至正郎而自請知縣不計品位之崇卑不論祿秩之多寡惟知盡瘁報國而已其用心之厚何如哉今之縉紳奔競成習居內則為遷在外則為黜亦豈盡無張知白韓授輩然不可謂皆若人也祖宗黜

陟之法盍亦講而行之乎紹興之詔曰卿監郎官更迭
補外侍從有闕選守臣監司此法而可行也乾道之詔
曰外有治效擢之內職內有實績擢之外任此令尚可
申也外官月俸尤更豐足有能以唐為言如范仲淹富
弼者乎二千石治效增秩賜金有能以漢制為言如昔
人者乎不然彼方有登仙之望吾乃強之以勞人之職
亦終於不樂而已矣不樂其職何以牧民

帖職祠祿國家之所以遇臣下者至矣盡矣不可以有

加矣特未知臣下之所以報君為民之意如何耳夫居其位而後享其祿任其事而後安其榮必也上無負於君下無負於民中無愧於心而後可也今也朝廷大臣至於州縣小吏有居其名而不在其位者有尸其位而不治其事者不知其幾人也或閒居而祠祿或優寵以職名或坐展磨勘或例沾郊賚或引年有加恩或老死有遺澤考之漢唐典故自食邑致仕奉朝請外所未聞也其視自提壺殫仕無廩俸之代為如何耶國家之所

以待臣下者至矣盡矣不可以有加矣王安石乃挾祠

祿以為擠屏之具

司馬溫公提舉嵩山崇福宮凡四任神宗末年欲用光而蔡確王珪沮之

已乃蔡京乃假職名以為寵利之私其所以報君為民又何如哉臣之厚民之薄勢使然也

羣書考索續集卷三十七

欽定四庫全書

羣書考索續集卷三十八

宋 章如愚 編

官制門

吏治

宣帝循吏多於文帝宣帝寬仁恭儉不及文帝天資刻薄頗類景帝其所能垂意吏治而以良二千石為重者徒以舊勞於外備知閭閻疾苦吏治得失故也其天資刻

薄終不可掩夫是以循良之名多歸於吏彼其循吏之數多於文帝之世者正以文帝寬厚長者德意志慮盡出於已不待吏為之宣帝德意既薄於是循吏之名始稍著見於世名不在君而在吏既有以見其君之無足言者然自數人之外酷吏亦可知其不少矣貫珠舉郡縣皆循吏而無循吏之名纔說循吏必有酷吏區別於其間故漢之循吏正為宣帝而作東漢之循吏正為明

帝而作

陳君
舉

德化盛則循吏無稱循吏變風之美酷吏變小雅之刺

德化在上風俗淳一則循吏無稱

文帝時是也吳公故不立傳如正雅無風

教化闕則國異政然後吏著稱

文翁興學是也如列國有風

宣帝循

吏最多亦有褒貶知擇任二十石

良吏為盛宜褒

然宣帝雜

霸刑名一時吏能亦多承宣帝意嚮惟王成黃霸龔

遂召信臣朱邑有德遜之風

義歸於上則上有歎

武帝時只一

仲舒

然事不止於循良吏洪寬格儒又與仲舒不同

循吏各有所長

朱邑廉平王成勞來

信臣勸農
文翁興學

宣帝雖有循吏亦有酷吏宣帝時雖有循吏酷吏亦不少循吏只是數人皆緣宣帝德意薄故名歸良吏若文帝時豈可勝紀又緣帝長於民間故知民疾苦緣在民間知官吏欺弊賞罰不明故綜核名實信賞必罰緣知民間愁苦由吏不良故選良二千石此良吏所以盛也然宣帝雜霸任刑一時能吏皆以嚴治承帝意向惟王成黃霸龔遂召信臣朱邑有德遜之風文帝吏不入循吏酷吏傳

景帝始有酷吏文帝寬仁無酷吏景帝初承文帝後吏尚寬郅都獨嚴故為酷吏之首然郅都乃在鎬後文帝吏不入循吏酷吏傳景帝始有酷吏緣景帝學鼂錯寬仁貶於文帝此酷吏所由起也

武帝時皆是酷吏武帝朝無循吏皆是酷吏武帝本非慘刻之資只緣多事欲齊之以刑班固正其名別其義上有好者下必有甚焉序意當矣迹其上以為能一語即見上之人欲齊之以刑之意矣

武帝以酷吏為能能之過則為酷故能吏多見於酷吏
傳故凡武帝之所謂能者皆班固之所謂酷也蓋武帝正
以多慾而起多事惟天下之惑亂吾意也故寧以刑法
整齊其民以能吏趣辦其事故班固云雖酷而能稱
其位矣楊僕為主爵都尉治放尹齊上以為能拜為
樓船將軍王溫舒為河內太守好殺行威上以為能遷
中尉

凡能吏必有赫赫之名故王溫舒為廣平都尉廣
平道無拾遺迹其上以為能一語即見武帝齊之

以刑
之意

考課

唐虞成周考課先申明邦法而後誅賞或問太宰之職
正月之吉乃始和而布之正歲之月乃始垂象觀之邦
國都鄙官府之中乃始施其治牧監正貳之屬乃始建
其人何也此所以申明吾之法也歲終三歲將有以考
課其人正月正元日四岳四門之詢闢四目四聰之明
達十二牧之咨二十二人之戒猶諄諄然命之者是固
將以為考績之地也夫是以前黜陟去四凶天下至於

咸服後黜陟而分三苗庶績至於咸熙三代以來世守此道周人考課之法尤嚴於唐虞三代之舊考之周禮有所謂逆其治者執吾之法而逆儆戒之於其先也有所謂待其治者既儆戒之則待其成而考驗之於其後也如宮正監師司會大司徒小司徒卿大夫族師黨正鄙師內史司寇士師之屬則皆所以考其事如宮正饁夫酒正太府職內司會司書內宰司泉泉府藁人舍人之屬則皆所以考其財如太宰小宰宰夫則兼統而兼

考之故日之有成日考之也宰夫受之月之有要月考之也宰夫令之而小宰受之歲有會歲考之也小宰贊之而太宰受之也二歲之有計三歲考之也冢宰贊之而王親受之蓋有官則必有事有事則必有考人與官不相違功與法不相悖則置之賞之其官則然其人則不然其法則然其功則不然則廢之誅之太宰既已三歲計吏而殊賞司士亦三歲稽士而進退非一切委之以法而聽其人之自縱也周人考課之嚴如此夫豈遽

行其法而逆其效也哉其本末源流固自有次第非汲汲焉於朝夕之頃蓋曰成曰要雖不廢於日月而會計之大則必遲遲於一歲三歲之終申飭儆戒之必嚴勤勤於正月正歲之始在太宰則始和挾日而後斂在小宰則正歲帥治官之屬觀治象之法而懼之以大刑在宰夫則正歲以法儆戒羣吏令修宮中之職事而勸之以良能以至大司徒正歲帥屬觀教而卿大夫州長黨正以考而讀焉大司寇正歲帥屬觀刑士師亦慮而禁

令焉故凡昔者經國之大綱為治之條目煜煜然常有日新之意奉行之吏聯事合治之人欣欣然常有日新之功法若始立之法入若始用之人戒飭勉厲之餘有奮發而無懈怠有勅正而無玩弛能否畢見賢不肖無所隱至是考績之法始可行小而予奪大而生殺始可以各當其情也

考課詳於外而不詳於內行於小吏而不行於達官漢考課之法詳於外而不詳於內行於小吏而不行於達

官郡國長吏既有以上計以較其殿最而部刺史以其六條督其治行天子時遣使者乘傳行四方以察吏考俗而公府聽采長吏臧否以謠言舉按輒被黜免大率於外為詳也至於內則不過三府者光祿勳歲考察德行以進退之而已雖曰故事選郡國守相高第為中二千石選二千石為御史大夫任職者為丞相然進退之序亦未必一以考課為黜陟也焦延壽為中黃令舉最增秩王溫舒試亭長以事數廢賞罰若甚公矣然兒寬

為左內史與民假貸而負租課當免而更以最治評為第一而卒不聞其擢用此皆行於小吏而不行於達官也至於京房奏考功課吏法欲以丞令治一縣崇教化亡犯法者輒遷尉有盜賊滿三日不舉發者則尉事也令覺之自除尉負其罪則又行之於縣有上下相司之意其法煩碎不可用矣嘗聞魏正始中上使王昶撰百官考課事昶以為黜陟之文而考課之法不垂周制冢宰之職大計郡吏之治而誅賞又無比較之制由此言

之聖主明於任賢畧舉黜陟之體以委達官之長而總其統紀故能否不可得而知也大意以上考下郡以課縣如扶風課茂陵蕭育第六是也州以課郡如刺史以六條察二千石歲終則奏事舉殿最是也丞相總職庶官如丙吉之歲竟丞相課其殿最以賞罰是也

唐考功之法善考績之法唐虞至成周未嘗一日廢也秦漢之興此法亡矣京房區區欲舉而行之卒不見效而身死讒口漢魏而下未能行其緒餘者惟唐興獨有

成法終始行之以有可稱焉其法有四善二十七最善
以著其德行最以著其才術以善與最相為乘除分為
九等以考中外官上者加階其次進祿其下奪祿又其
下解任歲定京官望高者二人分校京官外官考而以
給事中中書舍人莅之其後屢置知考使嘗以宰相
董其事見於傳記如孫狄之鑒班宏之公趙景盧承慶
之達崔隱甫之敏趙宗儒之核皆可以稱記雖孫逖
宋朝
人書何易于事托言邑民譏益昌令不得上考然易于

以不失考中上雖陽城自書下考而益以顯名至如李
渤考功員外郎爾乃自宰相而下升黜之雖其事不見
施行讀其表辭抑揚奮厲令人神竦大抵唐之法唐虞
三代之美意也三代而下皆不能行獨唐能始終行之
此其所以為可嘉也矣且其間豈無徇私任情之弊而
其法自不可廢必也因噎廢食因溺廢舟則宰相之除
授長官之薦舉豈皆人人無私而亦可廢乎嘗考之唐
世以物望取人而不疑於有司者其槩有三一曰貢舉許

人以廉獻往往皆得公然推薦二曰選曹鑒裁甄拔
不一切關於資考三曰考功有褒貶之實有升降之由
此三者今皆無有然唐賢言選舉之弊多矣至於考課
初無異議趙景審官六議其四亦言考課之善而已今
若舉而行之又何難焉

薦舉

武帝朝所薦皆言利之人長君之惡其罪小逢君之惡
其罪大以吾觀鄭當時之立朝未免於逢君之惡也武

帝外興師旅內修宮室窮奢極侈使其不得興利之臣
四顧索然莫能措手又將懷財盡民散之懼卓然更化
復於質朴使哀痛之詔富民之侯必不至於末年而後
行也當時不知出此反逢迎武帝之意薦東郭咸陽孔
僅權鹽鐵算舟車言利析秋毫以滿帝之欲俾帝之侈
心與財俱長是猶蛟龍之雲雨虎豹之羽翼也大節耗
虧縱有推轂賢材之意豈能掩其失耶昔鯀之湮洪水
三苗之即功共工之象恭滔天彼其竄殛之刑無可疑

者惟驩兜亦嘗稱共工於堯朝而遽與三人同罰者抑有深意焉功莫大於進君子罪莫大於進小人小人一至則亂國無所不至推其原究其本非自人以薦之小人安能自進哉以是而論雖切其罰不為過也當時苟生於舜之時吾知其不能逃崇山之貶矣

舉主改官之弊今議者以舉主轉官為進賢此不知其弊之深也大凡善惡之人各以類聚故守廉謹者各舉清幹之人有賊汙者各舉貪濁之人好徇私者各舉請

求之人性庸闇者各舉不才之人朝廷不問是非但見舉主數足便與改官則清幹者進矣貪濁者進矣請求者進矣不才者亦進矣混淆如此便可與進賢之法乎連坐舉主之法非聖人之所以不責人之所不能者得以深責乎人之所能也後之立法者異於是責人以其所不能而其所能者不深責也宋朝自祖宗以來責有薦舉除授之目仍列舉主姓名或在官貪濁不公柔懦不理職務廢闕處斷乖違並量輕重連坐且夫人之難

知自禿舜病之矣今日為善而明日為惡猶不可保況於十數年之後其幼者已壯壯者已老而猶執其一時之言使同被其罪不已過乎故曰今之法責主以其所不能者謂此也

薦舉為國非為己張安世嘗有所薦其人來謝大恨以為舉賢達能豈有私謝耶羊祜所進達之人皆不知所由嘗曰拜官公朝謝恩私門吾所不取也狄仁傑薦張柬之又薦姚崇等數十人率為名臣或曰天下桃李盡

在公門曰薦賢為國非為私也孫抃薦唐介吳中復為御史或曰君未嘗與二人相識而遽薦之曰昔人恥呈身御史今豈求識面臺官婁師德薦狄仁傑仁傑亦不知王旦舉孝行簡行簡亦不知此舉人不以為已恩者也左雄薦周舉為尚書既而雄舉馮直不當舉即以舉劾雄此為人所舉不以已而受其恩者也或問報國孰為大曰薦賢為大竭一身之智力其效少竭衆人之智力其效多

宋朝有擇舉主察舉人責舉主之法擇舉主於未用之
先察舉人於方用之始責舉主於已用之後此祖宗之
良法也咸平初上語李至曰凡所舉官多聞謬濫不若
先擇舉主此擇舉主法也太平興國之詔曰九品之賤
一命之微未嘗專望於有司必須召對於便殿此察舉
人法也乾德之詔曰除授之制書舉主姓名或不知舉
者並連坐之此責舉主法也擇之於其先則人知所勸
責之於其後則人知所懼天子又於其中而致察焉則

其權又不專在有司矣祖宗朝舉京朝官委之蘇易簡
陳恕舉御史委之樂黃知自陳微謂其人足以堪是選
也今之達官不能皆偉人一當其任例可揀按庶謹者
舉清幹贓汙者舉貪濁比之匪人如薦賢何祖宗朝高
惠連之績用面授朝官張祥之自新授以令長此皆親
得於顧問者也今之班引特為文具去黼座於數十步
之外聽唱姓名而已旅進旅退何以知人若乃連坐之
法則祖宗之所嚴而今日之所寬也昔邵餘慶受誓戒

不及猶劾舉主卽煜舉非其人已經數宥猶至停官其
法之嚴也如此雖曰改節中變許自陳首而又有不在
陳首之限者今也不然罪犯已著不可庇護舉主乃以
陳首而免連坐不罰而懼能幾何人三法皆壞而薦舉
之弊有不可勝言者矣竊嘗因賈黯之言而深思焉舊
制薦人不限員數自張易所舉猥多乃始限之舊制常
參官得論薦其後常參官不許論薦舊不以在任及所
統屬皆得論薦其後須在任及統屬方許論薦是向之

法疎而後之法密矣然天聖中改官者止數十人皇祐中已六七十人至於治平則三倍其數法之疎者其數省法之密者其數增此其故何哉大抵有勅舉有限舉勅舉主者闕其人則舉不闕則不舉也限舉者每歲有舉雖不闕亦舉也祖宗時闕令長則詔舉令長闕幕職則詔舉幕職闕京朝官則詔舉京朝官士大夫終身所舉一二人而已故可以選可以責天子亦可以閱視自夫監官郡守歲舉限員不問賢否但欲充數一人之身

更六七任則所舉不勝其衆雖欲行三者之法烏得而行之限舉不可行勅舉不可復善謀國者亦付之無可奈何而已矣噫薦李師錫者凡三十餘人擢之不次可也而上與循資賈積善吏用昭歷任書考薦之者無一人終身選調可也而特以京官與之祖宗權衡固有出於是法之外者神而明之存乎其人

薦舉得人呂蒙正之冊備盡人才陳述古之藁皆天下名士先正知人之明薦人之公得人之盛如此哉大抵

祖宗盛時公道著明大臣知薦賢報國而已士大夫知行已律身而已上以公取下以公進一毫之私心不預焉恩自己出王公曾嘗惡焉謝恩私門吾所不敢曾其今之師德歟曹彬之薦其子祈奚之於子也呂蒙正之薦其姪謝安之於幼度也范仲淹嘗攻呂夷簡而夷簡復薦仲淹唐介嘗劾文彥博而彥博復薦唐介此喬元之於陳球解孤之於荆伯柳也劉安世以不通溫公之書而被擢則恬退者進張師德以兩詣王相之門而見

卻則奔競者退論薦如此尚何議然則被薦者如之何
曰范仲淹之於晏殊每以不稱為羞若此者可以受所
薦矣未被薦者如之何曰呂舜從嘗謂勤於職事乃所
以求知若此者可以得所薦矣噫薦人者不私所薦被
薦者不負所薦未被薦者不干所薦又烏有薦舉之失
實哉故愚不敢以任法論祖宗而以任人論祖宗

舉人乃所以為賢已賢不及賢也已賢而舉人之賢斯
賢矣已能未為能也已能而揚人之能斯能矣陳述古

襄之侍經席也所薦之士自司馬君實而下三十餘人皆賢能之士也嗚呼盛矣其後高宗紹興元年求賢手詔亦舉陳襄薦賢事

趙普堅薦二人普之相太祖也嘗為其事擇官普列二人姓名以進太祖不肯用他日又問復以進又不用他日又問復以進太祖大怒裂其奏擲殿陛上普色不動搢笏帶間徐拾碎紙袖歸中書則補輯之復以進太祖大悟終用二人

限日舉賢慶元六年臣僚申請述孝宗之訓明詔兩省
侍從臺諫之臣限三日各舉一二員謂嚴三日之限所
以杜臣下請托之私奉聖旨依仍不許宰執臺諫侍從
親戚子弟交薦

改官李廔進卷云初選人之未改京官也但以積考序
進雖有保舉課試之式進者不必皆由此途真宗益謹
課試多所升黜而保舉之詔又數下進者稍繁矣大中
祥符三年始募幕職州縣官須三任六考始得論薦被

保舉者或一二人或三四人亟加遷擢執事頗惡其濫命自今待及五人始以名聞自明道後則又裁定內外臣僚歲舉官數文臣自待制至御史武吏自觀察至諸司副使各有等級不許輟過而被舉者非其本部監司按察司不聽磨勘其法制頗詳寶元末因上封事者言磨勘京官者必六考以上而嘗犯罪者加一等選人六考而改官實起於此慶歷初更命諸州視邑之多少薦舉差等而守將始有限矣皇祐初更命監司以所部多

少劇易之差為舉人之數尋復裁定舉京官數而部刺史之舉始有定限矣

舉官額天聖數十人紹興百四十人孝宗朝百二十人為是真宗行三年磨勘之法皆可積考而進無賢愚之別故自真宗以來改官之制不得不限其舉官

選舉

王制命鄉論秀士升之司徒曰選士司徒論選士之秀者而升之學曰俊士樂正崇四術立四教順先王詩書

禮樂以造士夫樂正論造士之秀者以告於王而升諸
司馬曰進士司馬辨論官材論進士之賢者以告於王
而定其論論定而後官之

周禮閭胥書其敬敏任恤族師書其孝弟睦姻有學者
黨正書其德行道藝州長正月之吉考其德行道藝而
興賢者能者鄉老及鄉大夫帥其吏以禮禮賓之厥明
鄉老及鄉大夫獻賢能之書於王王再拜受之登於天
府內史貳之此謂使民興賢出使長之使民興能入使

治之

漢唐制度選舉之法一變而為辟舉再變而為限年三變而為中正四變而為年停五變而為科目自隋始置進士科而唐因之其科目之不一而明經進士尤貴其得人已盛可為後世之良法也古之所謂鄉舉里選猶曰鄉里之舉選云爾唐則不然舉以禮部謂之貢舉選以吏部謂之銓選其名同其事異而其意於古有合苟循其制而善用之雖古所以取士之方何以加是哉漢

初為辟舉之法限以四科一曰德行二曰經學三曰明
法四曰任事要知本末具舉此其意又與周官考其德
行道藝而賓興之豈遽相遠然而舉之於郡國而任之
於王朝其初天下畏法莫敢繆舉而不舉者有罰其後
舉者猥濫而妄舉者有罰則徇私忘公之弊已形矣左
雄為限年之法但使諸生試學文史試章奏一切責之
以課試而貢舉之漸興也當是時胡廣張衡已議其非
以為詔舉孝廉一以能誦章句節奏按為限是為損本

而忘末而魏氏之興遂立九品之法州郡皆置中正以
定其選其取士之意本欲合之於古以德行為先而其
弊乃至於純任閥閱不論賢愚故劉毅云上品無寒門
下品無世族晉宋循襲莫之革弊夫以名求之則中正
之選豈不合古然流弊之甚歷代厭苦反不若左雄課
試之法行之十年號稱得人然則善法古者又何必徇
其區區之名也九品之弊權歸吏部劉毅云一吏部兩
郎中而欲究竟人物何異以管窺天而求其博於是崔

亮為停年格士無賢否專以解日月為斷謂之年勞甄
陞踵而行之史謂魏之失才自亮始然其法亦因時制
爾夫豈得已哉崔亮年停之法即裴光庭之循資格也
於時為譏於今為用是亦烏可少哉觀亮與甥劉景安
書亦以激於中正之弊而為此爾故格法創於魏科目
興於唐皆所以救中正之弊也陳黯曰進士科目自漢
至唐為擢賢真知言哉

唐選舉之弊當唐之時言其選舉之弊一曰不求德行

而第考文章之末藝以為非古薛登曰古之取士必考素行之原詢鄉曲之譽漢世求士亦觀其行碩文效試

官武閱守禦劉曉

通鑑作劉曉
上元元年

國家以禮部為考試之

門考文章於甲乙故天下驅馳於才藝不務德行楊綰請因古制縣令舉孝廉於刺史刺史升之禮部柳冕言文章之士不根教化進士以詩賦取不先道理明義以墨義考試不舉儒術選人以書考殿最不尊人物各有旨義著於史集以此知本者然而不考其

所以變之之由則亦不足以為義也古者天子自治者王畿千里之外即為封建其王城二百里之外又責之都鄙之長則天子所治者六鄉六遂二百里之間耳當此之時四民皆世其業無越乎分守其比閭之民修其德行而書之鄉大夫者又非有後世驟貴峻拔之藝固亦無所覬覦而其心術純一毀譽自不相冒鄉遂之官下視所隸伍伍相聯朝夕相習可以指數而心喻又不難乎考察下漢而郡國雜置然其僚佐皆自辟除常歲

所貢率二萬口貢一人不過一二百人而止以天子之
朝公卿之重一歲之久按郡國所推薦一二百人之賢
否進退雖在數千里之外亦無難者自漢武稍稍裁抑
侯國秩二千石不許擅授魏晉而降權益內移故有勅
用州簿郡功曹者至於隋制則一命以上之官皆由朝
授由是朝授歲選動以萬計而後世爵祿益貴奔競成
習欲以無形之德行不可憑之毀譽人人察之而冀其
有得豈不難哉魏之中正曷嘗不以德行為本而流弊

之甚後代苦之要知封建不立世祿不行郡縣之權悉歸朝廷而欲倣古貢士之常制不可得已故科目兆於漢興於隋著於唐而備於宋朝此誠擢賢之路也誠使收之以貢舉格之以法律而分置之朝廷與州縣嚴為考績之法而徐攷其後豈不合於唐虞所謂敷奏以言明試以功之良法哉而奚遽不足以得其德行之實也哉又奚至於捨本而徇末也哉

鄉評人之實行能掩於人之所不知而不能逃乎鄉黨之

公議故古之論秀必本於鄉而漢之取士猶有鄉舉里選之遺意也武帝求賢良國人共推公孫弘以充賦萬石君家以孝謹聞郡國特以其子為郎中令一推兒寬則曰知之久矣一言蕭望之則曰此東海蕭生耶一薦龔勝則曰固已聞其名其令聞美譽固已素著於鄉而達於朝廷之上蓋如是其不可掩也至於酈食其家貧落薄縣中謂之狂生韓信家貧無行不得推擇為吏陳湯丐貸無節不為鄉里所稱公議之在鄉里昭乎不

可泯沒安能掩其所不知而用之欺君哉是故能自持
於鄉者然後州縣拔為幹佐曹吏能自立於州縣者然
後五府辟為曹掾能自效於五府者然後朝廷所選用
其初皆本於鄉里公譽也是以高祖之初郡縣各置三
老相帥為善而又設為孝廉之科以取士其殆有意於
鄉舉里選之舊乎

貢舉高宗時劉祥道言歲入流千五百經學時務比雜
色人三分不及一玄宗時楊場言流外及諸色仕者歲

二千過明經進士十倍是唐科目取人不及雜色入流之衆也然唐取士之途又有二焉由學館曰生徒由州縣曰鄉貢而楊瑒言明經進士百人二監生千百數當選者十之二而得第者無幾是言生徒不及鄉貢也進士科不過二十人故杜佑言進士得第者百一二明經者十一二是進士又不及明經多也生徒不及鄉貢進士不及明經明經進士又皆不及雜色入流此其選數之大凡也唐初貢舉屬之考功至開元移之禮部所謂

主司皆有常人則既預知之矣不惟預知也亦可預謁之
不惟預謁也亦可預托之貴者以勢托富者以財托
親故者以情托此豈復有真貢舉哉故有因權勢以相
傾奪如牛李之黨由於錢徽典舉之日至於互相磨軋
者四十餘年於是又有畏嫌自私而矯時以為公者則
有嫌於貴而不得舉者矣如韓退之之序齊皞是也有
嫌於富而不得舉者矣如柳子厚與王參元書是也幸
而不出於私則又不幸而入於矯夫其矯者必有所懲

也故觀其矯而思其所懲之由則通榜取士弊且如此此唐名臣多由此出彼果何以致之耶豈其有徇私之弊而猶不失其收時望之利耶若夫崔羣之第緣梁蕭杜牧之第緣吳武陵李商隱之第緣令狐陶盧肇之第緣李德裕每每類此亦何惡於請托哉

唐志謂進士尤貴得人亦盛唐志謂衆科之目進士尤貴其得人亦盛然嘗論之以唐貢舉之員數較之他流則狹矣以唐貢舉之條式較之今日則疎矣然而足以

得人何哉曰儒科之重自唐始其狹且疎何尤焉而其
流品之別公望之屬抑有自來故雖狹且疎而猶足以
得人是儒科之所以重也韋貫之嘗言禮部侍郎重於
宰相憲宗詰其故對曰為陛下東宰相者得無重乎權
德輿為禮部侍郎擢進士第者七十二而登宰相者十
人其他征鎮兵牧文昌掖垣之選不可悉數則知其時
待之之異選之之重有在於是而其奮然於事業為國
名臣者多出於其間前世所無也杜牧言國朝自房梁

已降有大功立大節者率多科第人也因歷數其人謂
郝處俊來濟上官儀李元義婁師德張柬之郭元振魏
知古姚元崇宋璟劉幽求蘇頌父子張說張九齡張巡
裴度凡十九人皆文武全才傑然不世出者然牧所言
及其時而止間猶有遺者以此見唐史得人之盛非虛
語也

漢科目漢之取士隨時設目蓋非一科其行之最久得
人為多者在學校則有明經在郡國則有孝廉賢良茂

才明經而已孝廉始於高祖賢良始於孝文茂才明經始於武帝四者之科終漢之世不變而公卿大夫多由此途出然愚以為碩大宏博之材要非科目所能得限人以科目之選則其所得豈復有異才哉蓋明經止於藝以射策為甲乙非有深探聖人之旨賢良止於射策與時世為俯仰非有直言極諫之士鄭司農謂舉孝廉比於周之賓興舉茂才比於周之興能此又名似而實非也是以業明經者志在於取青紫應賢良者志在於

貪權勢陳湯舉茂才有不奔父喪之罪徐淑舉孝廉而不能逃冒年之責以科目取士而得人若是其有卓然不羣出其中者特幸耳雖然漢猶不專倚於科目也鄉里有推譽之公州縣有辟除之選故士之修於鄉者雖不由科目以進而辟書踵門選拔州縣等而上之豈與科目之士同於擢用此後世之所未講也

銓選

漢無限年古者四十強而仕七十則引年而致仕故其

未仕也用其半生為學而後可以入仕及其既仕則以三十年宣力於國而晚歲休致又足以自養其筋力故下無躁進而上無貪位漢世士大夫自少至老初未始有限也劉向以十二為輦郎陳咸以十八為郎貢禹之子年十二而元帝欲祿之其入仕不幾於濫乎劉辟疆以八十為衛尉公孫弘以八十為丞相充國以七十餘為將軍貢禹以八十一遷御史大夫是未至於老癯者皆可以綰綬於朝也平帝始平中龔勝漢邴以年老乞

骸骨詔策遣之始有古者年至致仕不盡其力之詞後漢左雄議限年法四十以上始郡舉孝廉是二者俱有得於古人之意今制二十八仕七十致仕視漢世為得而所以致入仕之源者抑猶有可議者乎

遷轉漢之遷轉惟上所命初不以品秩高下為升降故士亦俯首聽命而莫敢有所請張釋之十年不得調揚雄三十不徙官至有為太僕立功自高至文而猶未離乎舊職則何有淹滯若此也賈誼超遷歲中至太中大

夫公孫弘徒步數年至宰相封侯王仲翁大將軍長史
三歲至光祿大夫若此者又何其速也彼其黜陟進退
雖未必皆當乎賢否而其用舍之權一出於我固未始
有資格之拘然至於大臣不職去之可也收其印綬可
也亦何至左遷他官以奪之哉孔光免丞相為博山侯
久之復為光祿大夫位次丞相月餘為御史大夫未幾
復為丞相以至韓安國蕭望之翟方進之徒皆以御史
大夫為他官

安國為中尉望之為
太傅方進為京兆尹

彼嘗執天子之政矣

嘗正百官而統其權矣今一旦降尊就卑使其僚佐比肩而治事豈所以待大臣哉國朝體貌大臣之禮可為萬世法

辟除漢選部有尚書自縣令以上始赴尚書調選

張故

其

餘郡縣之屬吏至於公府之掾曹各自辟於其長其諸侯王國自內史以下亦皆得以自除是以朝廷無銓選之勞官府有薦賢之實賢否勤惰各察於其屬之長而黜陟之故幹佐曹吏拔於州縣者然後為五府所辟五

府舉掾曹然後為朝廷所用推而至於公卿之尊初未始有限也故何武以大司空辟鮑宣為左曹掾史高領尚書事而辟匡衡為議曹史此曹掾之辟於公府者也周景以刺史而辟陳蕃為別駕王渙以方城令而辟仇覽為主簿此屬之辟於郡縣者也是以士之修潔於家而聞譽達於朝廷往往辟書交至其門而無遺才此漢之選吏所以一付之公議而猶未至纖悉於法也今吏部注擬下自監宮筦庫之流一切選之尚書其年勞

資格而例以予之若執契券而責債其主奚暇問其賢不肖哉

選曹自隋一命之官皆授之朝廷州郡之官悉歸於吏部而唐承其制不能彌縫其闕更張其弊是以論者不滿焉唐之選法始於孟冬終於季春天下之士奔走於往來秋而往春而歸歸裝未解而選期又至是以遠者不能至貧者老者不能至至者不能歸此其患一也其選法與禮部無異自五品而外更歷之久亦不能免庸

有顧重而不屑就者此其為患二也凡選無常員雖至者千百而授者不能什一則有出身二十年而不能祿者此其為患三也夫羣天下之士而決於一二有司之目察其貌言考其書判任公之吏力有所不逮容私之人亦何所不至至於請托縱橫奸偽百出無足怪也此其為患四也唐都長安每歲常輸江淮之運以足饋餉今也進士雜流動以萬集僕馬之數又倍於是匱耗地力孰甚於斯此其為患五也又其莅官率以四考及其

滿秩理年即還限以歲數乃得選集得失之際又不可
必去位者顧戀有不忍之意居官者放縱無堅持之操
此其為患六也凡此六患唐之諸臣極言其故而求所
以革之之方皆以為莫如復漢辟舉之法而卒不能行
漢初風俗猶古郡國守相得自辟舉中葉以後猜疑交
作拜徙如流則既已不可行而況又其後乎夫不私於
物物亦公焉不疑於物物亦誠焉今既郡守數易不如
漢權任不如漢漢二千石下委之選除今以一命悉由

廷授而獨於辟舉欲循漢舊不亦難乎夫自漢武以來極力以收郡國之權至隋而後盡豈其能一旦復散之耶故辟舉之法雖善非復唐所能行也宋朝循唐選法而六患自亡乃有任人不任法之患似直過云

流品漢之用人不分流品視其材能勲績等而上之無有限格周勃以木強申屠以屢張薛宣以書佐魏相以卒史皆致位丞相然其入仕之始等級次第亦自有品節存乎其間其以明經博學進者則多除博士或大夫

侍中如嚴助朱買臣疏廣平當之徒是也其以材武勇
猛進者則多除太僕或中郎將驂乘如夏侯英公孫賀
衛綰之徒是也張湯以法律進身則先以法官處之始
為內史後為廷尉皆法官也黃霸以入粟補官則先以
財賦處之故始為卒吏後為均輸長皆掌財也雖其始
有所分別而積功累勲無不可任者也漢官所以未免
乎雜也武帝始用儒者為宰相革去軍功刀筆之選誠
可為一代之良法而其後惟意所用亦不專用儒生汲

黯謂刀筆吏不可為公卿蓋有激而云終漢之世清濁混淆上下無別以宦官典領尚書以儒術直祕閣尚書郎掌代王言而以令史久次補之宜乎丁邯恥以孝廉而為郎也誠使漢之用人上至公卿而有限法則雖流品之不分何害哉

雜流蕭何著試吏之法然諷書九千字以上者得為吏又賜六體書而課最者為尚書御史史書令史則為吏者因以諷誦字畫而為之矣至於太學選用文學掌故

之士則有補左右內史鴻臚卒史者有補郡守刺史以
至二千石屬者則胥吏之職固無間於清濁貴賤而為
之也故兒寬以射策補廷尉卒史龔勝孫寶以明經為
郡史路溫舒既為獄吏而又以通春秋舉孝廉薛宣朱
博皆起於書佐察廉補令丞而終至於丞相則知漢之
胥吏亦以功次遷選而無所限格也東漢有三公有長
史有符掾今所謂堂後吏是也或主長吏遷除或主民
戶祭祀或主詞訟賊盜或主貨幣錢鐵或主倉庫郵驛

或主卒徒轉漕或主奏議兵事皆以天下名士為之特以進仕之要而朱穆何敞班彪李膺之徒卒由此途進用一時俊彥萃於輔相左右其裨佐不既多乎今顧以為雜流使士大夫從事於此則必以為恥而不肯為矣銓選之制四選之法尚矣文武歸之吏部欲其合也文武別之左右選欲其分也文臣之升朝者尚書左選掌之初任幕職州縣官侍郎左選掌之武官之升朝者尚書右選掌之自副尉至從事侍郎左選掌之官之升朝

者屬之尚書其次屬之侍郎此元豐之制也元豐以前
曰審官東院則尚書右選也曰流內官曰三班院則侍
郎之左右選也此元豐以前制也國初文臣屬中書武
臣屬樞密使三班屬宣徽院所以然者蓋磨勘之制未
立而叙遷之法不復舉文武百官非有勞者未嘗遷秩
故舉而委之大臣有司無與焉自時厥後既分中書之
權而置審官院矣則不得不分樞密之權而置審官西
院既以宣徽所掌而歸三班院矣則不得不以幕職州縣

考課而歸之流內銓所以然者蓋磨勘之法既立叙遷之法既舉其事繁浩非大臣所能專故必舉而委之有司之職此元豐所以總而歸之吏部也因四選之分合原四選之建置則本末可以見矣

磨勘考課南曹之歷殿最必書御前之紙不及常事考課之法行之非一日矣然而始也其任在大臣其權在天子其後也其權在天子其任在有司又其後也天子不之問大臣不之與而有司之所謂考課者具文而已

矣國初文臣屬之中書武臣屬之樞密宣徽天子視握其權而進退焉此考課之始也淳化間分中書之權而置審官院流內分宣徽之權而置三班雖曰移大臣之職而歸之有司然天子臨軒顧問猶有所謂黜陟者存焉此考課之一變也至其後也非時之恩沛一定之資歷迭為遷轉不復考校然或以天子之悔悟或以大臣之論薦猶未至盡委其權焉此考課之再變也又其後也既置審官西院又以其權盡委之吏部天子不加引

對大臣不與參稽有遷進而無貶黜事權軟靡不可復收雖有司亦末如之何也已此考課之三變也噫變而至此極矣五代之除文武諸臣考滿則遷叙遷之法一代之弊政也而太祖革政能可旌也擢以不次無所稱者雖老不遷魏仁甫之羨利並命遷秩張之華之無聞至十六年不遷當是時在臣無私心天子無廢法曷嘗以資歷為遷進哉淳化中天子慮大臣之務未清而百官有司不及察也於是移其職而歸之有司雖曰磨勘

一法有司主之然天子實為之進退焉故有遷轉者有
貶黜者或引對而不改秩或供奉而至四十年不遷當
是時天子嚴其法而有司不得容其情亦曷嘗有遷叙
之弊哉至於真宗仁宗憫臣子之久次示一時之寬恩
或以磨勘而進秩或以考課而進秩雖足以明仁心之
形而不足以盡賢否之實然考課之際第以久次遷秩
非勸沮之道天子猶知悔悟也悔悟則革之矣文資三
年一遷武職五年一遷不問勞逸賢不肖並進大臣猶

加論列也論列則從之矣又況考覆引對此制未嘗缺焉其叙遷之弊亦豈如是之甚哉熙寧以來其權委之吏部上之人無與焉吏部既用格法不必銓量官秩則計歲月久而遷轉差遣則視資次高下而指射賢否混淆莫此為甚而後祖宗之良法廢弛無餘矣噫始者慮考察之不精而委之有司今也慮考察之自勞而委之有司夫既視為有司之事則朝廷不過奏鈔畫聞而已於所重也而輕之祖宗之意安在哉然則如之何曰擇

之以主判之官而委之以銓選之權庶乎其可矣天下之事惟專其任而後可以重其責昔唐德宗命陸贄撰常參官陸贄不從齊抗不遣官考吏部謂非任人不疑之道為今日計盍亦專政部之任而重吏部之責乎昔蘇公紳請擇主判付以事事責成選事誠格言也誠使權衡不欺如王質所判以衡鑑自任如文潞公所言則人不敢欺誠使揭科條如魯宗道榜資闕如趙及銓事悉自予奪諸吏聽行文書如杜祁公則人不容欺得人

若是雖無法可也若觀其事而不知名實聽其言而不知好惡見其容而不知其厚薄不察所舉而不知所予凡所注擬徒使吏挾法於前曰某人於法在所取某人於法在所後無所可否惟法之為聽則寧不有愧於先正彭公之言也哉

羣書考索續集卷二十八